

***Jawatankuasa Panel Semakan Teks Khutbah
Negeri Pulau Pinang***

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang

- 2. YBhg. Ustaz Muhammad Fadzil bin Alias**
Pengarah, Yayasan Dakwah Islamiyah (YADIM) Pulau Pinang

- 3. YBhg. Ustaz Ahmad bin Hashim**
Penasihat, Pusat Pengajian Tahfiz Al-Quran (PPTQ)
Kolej Islam Teknologi Antarabangsa Pulau Pinang (KITAB)

- 4. YBhg. Ustaz Subki bin Mohamed**
Mantan Pensyarah Kanan, IPG Kampus Tuanku Bainun

- 5. YBrs. Dr. Mohamad Zaki bin Hj Abdul Halim**
Penolong Mufti, Bahagian Fatwa,
Jabatan Mufti Negeri Negeri Pulau Pinang

- 6. YBhg. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia

- 7. YBhg. Ustaz Ahmad Shahimi bin Senawi**
Pendakwah

- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Hilangnya Warak, Lenyaplah Berkah

31 Mei 2024M/ 22 Zulkaedah 1445H

إِنَّ الْحَمْدَ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ وَنَعُوذُ بِاللَّهِ مِنْ شُرُورِ أَنْفُسِنَا
وَسَيِّئَاتِ أَعْمَالِنَا مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.

أَشْهَدُ أَنْ لَا إِلَهَ إِلَّا اللَّهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ.

فَيَا عِبَادَ اللَّهِ، أُوصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُؤْمِنُونَ الْمُتَّقُونَ.

SIDANG JUMAAT YANG DIRAHMATI SEKALIAN,

Mimbar pada hari Jumaat ini menganjurkan kepada tuan-tuan supaya berusaha meningkatkan takwa kepada Allah *سُبْحَانَهُ وَتَعَالَى*. Mudah-mudahan kita mendapat perlindungan Allah di alam barzakh dan dijauhkan dari api neraka di akhirat kelak. Itulah sebenar-benar kejayaan bagi seorang mukmin.

Sebelum meneruskan bicara, suka khatib memberi peringatan agar kita tinggalkan perbuatan lagha yang bertentangan dengan sunnah serta adab iaitu tindakan yang memesongkan perhatian daripada mendengar khutbah dan isi kandungannya. Pada hari ini khatib ingin sidang jemaah



sekalian memberikan sepenuh tumpuan kepada isi khutbah yang bertajuk, **“Hilangnya Warak, Lenyaplah Berkah.”**

HADIRIN YANG DIMULIAKAN ALLAH,

Kita sedia maklum, pada tahun lepas sebuah restoran menjual nasi ayam di Sri Petaling telah tular kerana dikatakan menggunakan bahan beralkohol iaitu *rice wine* dalam makanan yang dijualnya. Sebelum kes tersebut, tular juga dua buah premis di Georgetown yang mana pemiliknya seorang muslim menjual nasi ayam dan nasi itik. Namun apa yang menyedihkan, ayam dan itik yang sudah siap dimasak itu diambil daripada restoran bukan Islam. Apabila siasatan dilakukan, ternyata restoran bukan Islam yang memasak dan membekalkan ayam dan itik tersebut turut menyediakan daging khinzir di restorannya. Bayangkan betapa ramai saudara-saudara yang kita tidak tahu hakikat tersebut telah termakan makanan yang syubhah dan haram kerana sikap tidak bertanggungjawab dan sambil lewa.

Sebelum tularnya isu-isu yang khatib sebutkan tadi, sebenarnya sudah beberapa kali kita dikejutkan dengan pendedahan berkaitan isu-isu produk makanan dan penyediaan makanan yang tidak menepati syarak, jijik dan menipu pengguna Islam. Dalam masa yang sama, di media sosial juga dapat kita lihat sebahagian orang yang kononya pencinta makanan tergamak untuk makan di mana sahaja premis yang mereka suka. Tular sahaja satu-satu restoran maka sampailah mereka. Dengan hanya bermodalkan tanda *‘No Pork’* atau *‘Pork Free’* dan *‘Vegetarian’*, maka mereka sanggup makan di restoran tersebut tanpa ada rasa apa-apa.

Wal’iyazubillah (وَالْعِيَّادُ بِاللَّهِ)



SIDANG JUMAAT YANG DIRAHMATI ALLAH,

Jika Yahudi terkenal dengan konsep pemakanannya yang disebut sebagai 'kosyer', maka Islam lebih sempurna dengan konsep *halalan taiyyiban*. Maka kerana itulah perintah berkaitan *halalan taiyyiban* ini disebutkan sebanyak 23 kali dalam Al-Quran. Allah **سُبْحَانَهُ وَتَعَالَى** berfirman dalam surah al-Baqarah ayat 172:

يَا أَيُّهَا الَّذِينَ ءَامَنُوا كُلُوا مِن طَيِّبَاتِ مَا رَزَقْنَاكُمْ وَاشْكُرُوا لِلَّهِ إِن كُنتُمْ إِيَّاهُ تَعْبُدُونَ ﴿١٧٢﴾

Maksudnya: *“Wahai orang-orang yang beriman, makanlah daripada benda baik (yang halal) yang Kami berikan kepada kamu dan bersyukurlah kepada Allah, jika kamu benar-benar beribadah kepada-Nya.”*

Saudaraku sekalian, apabila disebut pemakanan dan sifat warak, ia tidak dapat lari daripada dua elemen paling penting dalam agama iaitu syariat dan tasawwuf.

Beringatlah, apa yang kita makan bakal menjadi darah dan daging. Darah itulah yang akan menghidupkan fungsi jantung hati kita. Ketahuilah saudara sekalian, makanan sangat mempengaruhi jiwa dan pemikiran. Makanan juga menyebabkan badan kita kuat untuk beribadah atau sebaliknya. Ia juga membuka jalan kita di sana nanti sama ada ke syurga atau ke neraka. Pemakanan menjadi satu penentuan sama ada ibadah dan doa kita diterima atau tidak, mudah menerima hidayah atau hati menjadi keras.



Apa maknanya kita menjadi mukmin, jika doa-doa kita tidak didengar lagi oleh Allah? Seluruh kehidupan kita akan jauh dari rahmat dan keberkatan. Maka kucar-kacirlah kehidupan kita, keluarga dan masyarakat. *Wal'iyazubillah (وَالْعِيَاذُ بِاللَّهِ)*.

SIDANG JUMAAT SEKALIAN,

Para ulama' *salafus soleh* telah menunjukkan teladan yang cukup luar biasa tentang kewarakan mereka dalam pemakanan. Sebagai contoh Sufian *Ath-Thauri* (سُفْيَانُ الثَّوْرِي) رَحْمَةُ اللَّهِ , seorang guru tasawwuf satu ketika berhadapan dengan situasi tidak dapat mencari makanan yang 100% halal, jadi dikisahkan hanya memakan tanah untuk beberapa hari sementara mendapatkan yang halal.

Zun Nun Al-Misri (ذُو النُّونِ الْمِصْرِي) رَحْمَةُ اللَّهِ , seorang tokoh sufi terkenal di Mesir ketika beliau dipenjara, pernah dikirimkan makanan yang halal daripada seorang wanita yang solehah. Makanan itu dibeli daripada wanita tersebut hasil daripada pekerjaan menenun kain yang dilakukannya sendiri. Namun, Zun Nun telah menolak makanan tersebut kerana makanan tersebut telah disampaikan melalui tangan pegawai penjara yang zalim.

Diceritakan oleh Imam Abdullah Al-Haddad dalam kitabnya yang masyhur, "Nasihat Agama dan Wasiat Iman." Pernah terjadi ketika peristiwa sekumpulan *salafus soleh* menziarahi orang yang sedang sakit tenat pada waktu malam. Sebaik sahaja pesakit tersebut meninggal dunia, maka berkata salah seorang daripada mereka:



“Padamkan semua lampu itu, kerana bermula dari sekarang semua harta di dalam rumah ini menjadi milik semua ahli waris yakni pusaka.”

SAUDARAKU SEKALIAN,

Kisa-kisah *salafus soleh* tadi sudah cukup membuka mata kita supaya terus bersikap warak. Sesungguhnya mereka berada di sebaik-baik zaman. Layaklah mereka dijadikan suri teladan dalam kehidupan kita walaupun kita hidup dalam zaman berbeza.

Ya, akses mendapatkan makanan amat mudah. Kedai-kedai dan pasaraya besar merata-rata, namun itu tidak bermaksud kita boleh bermudah-mudah mengambil sebarang makanan dengan membelakangkan syariat dan tasawwuf. Nabi ﷺ bersabda dengan berpesan kepada Abu Hurairah رَضِيَ اللَّهُ عَنْهُ:

يَا أَبَا هُرَيْرَةَ كُنْ وَرِعًا تَكُنْ عَبْدَ النَّاسِ

Maksudnya: *“Wahai Abu Hurairah, jadilah orang yang warak, nescaya kamu akan menjadi hamba Allah سُبْحَانَهُ وَتَعَالَى yang paling beribadah.”*

SIDANG JUMAAT RAHIMAKUMULLAH,

Khatib ingin menyeru sidang jemaah sekalian untuk meneliti sebuah hadis dalam khutbah pada hari ini. Nabi ﷺ pernah bersabda maksudnya:

“Wahai umat manusia, sesungguhnya Allah سُبْحَانَهُ وَتَعَالَى itu baik dan (Dia) tidak menerima melainkan yang baik dan Allah telah memerintahkan para



mukmin dengan apa yang telah diperintahkan kepada para Rasul”. Lalu Baginda Nabi ﷺ membaca surah al-Baqarah ayat 172 yang bermaksud: “Wahai orang-orang yang beriman! Makanlah dari benda-benda yang baik (yang halal) yang telah Kami berikan kepada kamu, dan bersyukurlah kepada Allah, jika betul kamu hanya beribadat kepadanya.”

Kemudian Baginda menyebut tentang seorang lelaki yang melalui permusafiran yang panjang sehingga menyebabkan rambutnya menjadi kusut dan berdebu. Dia mengangkat tangan berdoa “Wahai Tuhan,” “Wahai Tuhan,” sedangkan makanannya haram, minumannya haram, pakaiannya haram dan dia diberi makan dengan yang haram, maka bagaimanakah doanya akan dimustajabkan dalam keadaan demikian?

﴿Hadis Riwayat Muslim﴾

TUAN-TUAN SIDANG JEMAAH SEKALIAN,

Jelas dalam hadis ini mengajarkan kepada kita umat Nabi Muhammad ﷺ bahawa makanan mempunyai kaitan yang sangat kuat dengan Allah ﷻ dan kehidupan beragama kita. Ibnu Kathir ketika mensyarahkan ayat daripada surah al-Mukminun ayat ke-51 menyatakan, kekuatan untuk melakukan amalan soleh adalah tercetus daripada penjagaan pemakanan yang halal lagi baik.

Oleh sebab itu, para rasul عَلَيْهِمُ السَّلَامُ diperintahkan untuk memakan hanya yang baik-baik. Ternyata, daripada pemakanan yang baik-baik inilah menjadikan para rasul kuat beribadat, lembut hati mereka, mudah mendapat hidayah Allah dan melahirkan zuriat-zuriat yang soleh.



MUSLIMIN RAHIMAKUMULLAH,

Di akhir khutbah ini, khatib ingin mengajak saudara sekalian mengambil berat dengan saranan-saranan berikut:

Pertama: Selidiklah dahulu apakah yang akan kita suapkan ke dalam mulut anak-anak dan isteri supaya benar-benar halal dan tidak syubhah. Halal ini sama ada berkaitan sumber pendapatan atau makanan itu sendiri.

Kedua: Kepada pengusaha makanan Islam, hendaklah bersikap amanah dan bertanggungjawab terhadap pengurusan makanan. Pastikan sumber dan bahan mentahnya yang halal serta daripada pembekal yang dipercayai terutamanya soal sembelihan dan logistiknya.

Ketiga: Sebagai pengguna dan pengusaha juga, uruskan makanan dan kulinari mengikut tatacara syarak. Jika membasuh daging, pastikan dialirkan basuhan tersebut sehingga hilang kesan darah. Jika menggunakan telur dalam masakan, pastikan telur tersebut dibasuh kerana dikhuatiri masih ada sisa najis pada kulit telur.

Keempat: Belajarlah tentang hukum hakam berkaitan makanan kerana sesungguhnya kita bertanggungjawab terhadap apa yang kita makan. Khatib ingin mengajak jemaah supaya berfikir, apakah premis-premis bukan muslim akan mengetahui hukum-hakam ini? Tepuk dada tanyalah iman.

Firman Allah **سُبْحَانَهُ وَتَعَالَى**:

... قُلْ مَتَعُ الدُّنْيَا قَلِيلٌ وَالْآخِرَةُ خَيْرٌ لِّمَنِ اتَّقَىٰ وَلَا تُظْلَمُونَ فَتِيلًا ﴿٧٧﴾



Maksudnya: “Katakanlah (wahai Muhammad): “Harta benda yang menjadi kesenangan di dunia ini adalah sedikit sahaja, (dan akhirnya akan lenyap), dan (balasan) hari akhirat itu lebih baik lagi bagi orang-orang yang bertakwa (kerana ia lebih mewah dan kekal selama-lamanya), dan kamu pula tidak akan dianiaya sedikit pun.”

(Surah an-Nisa’ ayat 77)

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ،
أَقُولُ مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ،
فَأَسْتَغْفِرُوهُ، إِنَّهُ هُوَ الْغَفُورُ الرَّحِيمُ.





Khutbah Kedua Bulan Mei

2024M/ 1445H

الْحَمْدُ لِلَّهِ عَلَىٰ آلَائِهِ وَإِحْسَانِهِ، وَالشُّكْرُ لَهُ عَلَىٰ تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعَظِيمًا لِسَانِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَىٰ رِضْوَانِهِ.
صَلَّى اللَّهُ وَسَلَّم عَلَىٰ سَيِّدِنَا مُحَمَّدٍ وَعَلَىٰ آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اذْكُرُوا أَنَّ اللَّهَ سُبْحَانَهُ وَتَعَالَى أَمْرُهُ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿الأحزاب: 56﴾

اللَّهُمَّ صَلِّ وَسَلِّمْ عَلَىٰ عَبْدِكَ وَرَسُولِكَ مُحَمَّدِ بْنِ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنِ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَىٰ يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ،

اللَّهُمَّ أَعِزِّ الْإِسْلَامَ وَالْمُسْلِمِينَ، وَدَمِّرْ أَعْدَاءَكَ أَعْدَاءَ الدِّينِ وَأَنْصِرْ مَنْ نَصَرَ
الدِّينَ، وَاخْذُلْ مَنْ خَذَلَ الْمُسْلِمِينَ، وَأَعْلِ كَلِمَتَكَ إِلَىٰ يَوْمِ الدِّينِ.

اللَّهُمَّ أَنْصِرْ إِخْوَانَنَا الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلَسْطِينَ وَفِي كُلِّ
مَكَانٍ، اللَّهُمَّ ثَبِّتْ إِيمَانَهُمْ وَأَنْزِلِ السَّكِينَةَ فِي قُلُوبِهِمْ وَوَحِّدْ صُفُوفَهُمْ.



اللَّهُمَّ وَفِّقْ قَادَتَنَا وَرُعَمَاءَنَا وَوُلَاةَ أُمُورِنَا لِمَا فِيهِ عِزُّ دِينِكَ وَنَصْرُ شَرِيْعَتِكَ،
اللَّهُمَّ اجْعَلْهُمْ هُدَاةً مُهْتَدِينَ صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ
وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Sultan Ibrahim dan Kebawah Duli Yang Maha Mulia Seri Paduka Baginda Raja Permaisuri Agong, Raja Zarith Sofiah.

وَكذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالزُّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَن بَلَدِنَا هَذَا خَاصَّةً، وَعَن سَائِرِ بِلَادِ الْمُسْلِمِينَ
عَامَّةً يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta dapat mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.



عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٤٥﴾ فَادْكُرُوا اللَّهَ الْجَلِيلَ
يَذْكُرْكُمْ، وَاشْكُرُوهُ عَلَىٰ نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿٤٥﴾

